

四庫全書

史部

欽定四庫全書

史部

唐大詔令集卷六

詳校官編修臣范來宗

編修臣裴謙覆助

總校官編修臣倉聖脉

校對官學正臣常循

騰錄舉人臣徐元宸

欽定四庫全書

唐大詔令集卷五

宋 宋敏求 編

帝王

改元下

改元建中勅

奉天改興元元年赦

改元貞元並招討河中李懷光淮西李希烈

赦

改元元和赦

改元太和赦

改元開成赦

改元廣明赦

改元天復赦

改名

武宗改名詔

改元下

改建中元年勅

勅春秋有五色之統蓋王者踰年建號體元居正上以
繼業反始下以書事布策示不忍有變於中年也朕以
不造銜泣在疚而三事大夫迫至公之命喻大孝之道
寶奪子哀為衆所戴恐墜祖宗之遺烈不若先帝之前
訓如履薄將陷如乘奔失御濡露之感忽焉歲初罔極
之懷瞻天靡及舊物未改常典惟新勉而從之良增感

奉其以大歷十五年改為建中元年所司准式庶協履端於始載符皇極之義也

奉天改元建中五年為興元元年正月一日赦

門下致理興化必在推誠忘已濟人不愆改過朕嗣服丕構君臨萬邦失守宗祧越在草莽不念率德誠莫追於既往永言思咎期有補於將來明徵厥初以示天下惟我烈祖邁德庇人致俗化於和平拯生靈於塗炭重熙積慶垂二百年伊爾卿尹洎億兆人衆代受亭育以

迄於今功存於人澤垂於後肆子小子獲纘鴻業懼德
不嗣罔敢怠荒然以長於深宮之中暗於經國之務積
習易溺居安忘危不知稼穡之艱難不察戎役之勞苦
澤靡下究情不上達事既壅隔人懷疑阻猶昧省已遂
致興戎徵師四方轉餉千里賦車籍馬遠近騷然行齎
居送衆庶勞止或一日屢交鋒刃或連年不解甲胄典
祀乏主家室靡寧死生流離怨氣凝結力役不息田萊
多荒暴令峻於誅求疲吐空於杼軸轉死溝壑離去鄉

閭邑里丘墟人煙斷絕天譴於上而朕不悟人怨於下而朕不知馴致亂階變興都邑賊臣乘隙肆逆滔天曾莫愧畏敢行凌逼萬品失序九廟震驚上累於祖宗下負於黎庶痛心覩面若墜泉谷賴天地降佑人神叶謀將相竭誠爪牙宣力屏逐大盜載張皇維將弘丕猷必布新令朕晨興夕惕惟念前非乃者公卿百寮頻抗章表猥以徽號加於朕躬固辭不獲俯遂輿議昨因內省良用瞿然體陰陽不測之謂神與天地合德之謂聖顧

惟淺昧非所宜當文者所以化成武者所以定亂今化
之不被亂是用興豈可更徇羣情苟膺虛美重予不德
祇益懷慚自今以後中外所上書奏不得更稱神聖文
武之號夫人情不常繫於時化大道既隱亂獄茲豐朕
既不能弘道得人又不能一法齊衆苟設密網以罹非
辜為之父母實增愧悼今上元統歷獻歲發生宜草紀
年之號式敷在宥之澤與人更始以答天休可赦天下
改建中五年為興元元年自正月一日以前大辟罪已

下罪無輕重已發覺未發覺已結正未結正繫囚見徒
常赦所不原者咸赦除之李希烈田悅王武俊李納等
有以忠勞任膺將相有以勲舊繼守藩維朕撫馭乖方
信誠不著致令疑懼不自保安兵興以來海內騷擾皆
由上失其方而下罹其災朕實不君人則何罪屈已弘
物余何愛焉庶懷隱匿之誠以洽好生之德李希烈田
悅王武俊李納及所管將士官吏等一切並與洗滌各
復爵祿待之如初仍即遣使諸道宣諭朱滔雖與朱泚

連坐路遠未必同謀朕方推至誠務欲弘貸如能効順亦與維新其河南河北諸軍兵馬並宜各於本道自固封土勿相侵軼朱泚大為不道棄義滅恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其煽誘有迫於克威苟能自新理可矜宥但官軍未到京城以前能去逆効順及散歸本軍本道皆並從赦例原免一切不問天下左降官即與量移近處已經量移者更與

量移流入配隸及罰藩鎮効力并緣罪犯與諸使驅使
官無別勅於州縣安置及得罪人家口未許歸者一切
放還應先有痕累禁錮及反逆緣坐承前恩赦不該者
並宜洗雪亡官失爵放歸勿量量加收叙未復資者更與
進叙諸色降黜配隸人中有才能著聞者特加錄用勿
拘常例將士等或百戰摧敵萬里勤王捍固金城驅除
大憝濟危難者其節著復社稷者其業崇我圖爾功特
加彛典錫名減賦永永無窮並賜名奉天定難功臣身

有過犯通減罪三等子孫有過犯減罪二等本戶有差徭使役一切蠲除其功臣雖已后身老病患不在軍旅當分糧賜並宜全給身亡之后十年內仍回給家口其有實食封者子孫繼代無絕其餘收錄及功賞條件待收京日並依去年十月七日十一月四日勅處分諸道諸軍將士等久勤捍禦累著功勳方鎮克寧惟爾之績應在行營者並超三資與官仍勳三轉其累加勳爵仍許回受周親内外文武三品已上賜爵一級四品已下

各加一階仍並賜勲兩轉見危致命先哲攸貴掩骼埋
齒禮經所先雖效用之或殊在惻隱而何間諸道將士
有死王事者各委所在州縣給遞送赴本管官為葬祭
其有因戰陣殺戮及捕獲伏辜暴骨原野者亦委所在
逐近便殯葬應緣流貶犯罪未收葬者並許其家口各
據本官品以禮收葬自頃軍旅所給賦役繁興吏因為
姦人不堪命咨嗟怨苦道路無聊汙可小康與之休息
其墊陌及稅間架竹木茶漆榷鐵等諸色名目悉宜停

罷京畿之內屬此寇戎攻劫燒焚靡有寧室王師仰給
人以重勞特宜減放今年夏稅之半朕以克醜犯闕遽
用于征爰度近郊息駕茲邑供儲克辦師旅攸寧式當
褒旌以志予過其奉天宜升為赤縣百姓並給復五年
尚德者教化之所先求賢者邦家之大本永言茲道夢
想勞懷而澆薄之風趨競不息幽棲之士寂寞無聞盖
誠所未孚故求之不至天下有隱居行義才德高遠晦
迹丘園不求聞達者委所在長吏具名聞奏朕當備禮

邀致諸色人中有賢良方正能直言極諫及博通墳典
達於教化並識洞韜畧堪任將帥者委常叅官及所在
長吏聞薦天下孤老及鰥寡惇獨不能自活者並委州
縣長吏量加優恤其有年九十以上者刺史縣令就門
存問義夫節婦孝子順孫旌表門閭終身勿事大兵之
后內外耗竭貶食省南宮朕躬朕當節夫乘輿之服御絕
宮室之華飾率已師儉為天下先諸道貢獻自非供宗
廟軍國之用一切並停應內外官有冗員及百司不急

之費委中書門下即商量條件停減聞奏布恩行賞抑
惟舊章今以餘孽未平帑藏空竭有乖慶賜深愧於懷
赦書有所未該者委所司類例條奏敢以赦前事相言
冀以其罪罪之亡命山澤挾藏軍器百日不首復罪如
初赦書日行五百里告布遐邇咸使聞知

貞元元年正月改元并招討河中李懷光淮西

李希烈赦

門下王者體元立極欽若乎天地續承統業嚴奉乎祖

宗所以敬事修誠務本敦孝尊其上以御其下謹其身而訓於人百神允懷庶兆永賴國之大典莫重於斯朕燭理不明違道招損往遭大難臨陷都國天地宗祧曠而莫主是欽若嚴奉之義缺矣朕甚懼焉泊再復京師遽將告謝有司以人力耗斁禮物廢墜日居月諸歲聿云暮卜其近日甫在上春齋心永懷坐以待曙而百辟卿士抗表上言咸謂人心未寧不足以盡敬寇盜猶在不可以告功迫於羣情俯抑誠願郊廟孔邇瞻言莫從

悼心慚顏胡寧自處重以和平未洽災沴荐臻去歲旱蝗兩河為甚人流不息師出靡居加以徵求因之以荒饑困窮餒殍轉死丘墟而又闕輔之間冬無積雪土膏未發宿麥不滋詳思咎徵其失安在豈兵戎之后餘祲尚在將獄犴之中深寃未息且河中淮右逆將阻兵汚脅齊人陷之死地雖欲自雪厥路無由抱義銜寃足傷和氣此皆由朕寡德播災於人為之父母實用愧恥今玄陰已謝春日載陽勾萌畢申幽蟄咸震思與海內

同心自新布澤更元用符天意宜改興元二年為貞元
元年自正月一日昧爽已前大辟罪已下已發覺未發
覺已結正未結正繫囚見徒罪無輕重咸赦除之

改元元和赦

朕聞明王之以孝理也必先之以莊敬由一人之至德
鼓四表之歡心臻於太和以育庶類則下知禁而不犯
上措刑而不用斯道不遠弘之在予朕以寡昧嗣守丕
業荷累聖之洪休稟太上之嚴訓夙夜寅畏不敢荒寧

承顏而退有萬幾問寢而下臨四海虔奉惟眷施於兆人皇王以來孰有斯慶端本之化自子躬行摠百行之源刑四方之理推恩以覆育廣敬以昭事王者要道朕亦庶乎則日月之燭臨可以率俾昆蚑之涵養期於不天是必家至日見而後化洽刑清圖始所難慎終斯勉猶恐下愚之人因循陷辟官司之長教道未明迫於饑寒遂愆禮節誑誤之罔顧失政之多途哀矜之懷雖得情而勿喜思與公卿大夫及士庶勵翼循省以圖將來

且因體元之始覃比維新之澤上報於君父下念於蒼生頒慶紀年鴻恩斯洽可大赦天下改永貞二年為元和元年正月二日昧爽已前大辟罪已下常赦所不原者咸赦除之京畿諸縣今年青苗錢及權酒錢並宜放免地稅率每年量放二升淮江荆襄等十州管內水旱所損四十七州減放米六十萬石稅錢六十萬貫內外文武見任致仕官神策六軍諸道將士等各賜爵加勳有差武德以來功臣子孫與官及出身文武常恭

官觀察節度團練經畧刺史六軍大將等父母亡歿與封贈官至德以來任宰相與封贈及謚陝州奉天元從功臣普恩外更賜爵中書門下及外使宰相宜與一子官七品東宮官並與改官其撰冊文官等與一子官及勳爵有差天下百姓高年者賜米帛羊酒國子監祭酒司業及學官並先取朝廷有德望學識者充東都國子監諸管館共置學生百員應天下州府每年所稅地子數內宜十分取二均充常平倉及義倉仍各逐處當穩便

收貯以時糴糴務在救人

太和改元赦

朕聞古先哲王之為理也修己以安百姓恤刑以矜庶
獄端立政以謹始弘厚澤以體仁推其心以及於物誠
其中而化於外和氣斯洽休徵以臻故兵革不試而四
海寧疵癘不作而三靈泰我有唐祖武祖文光宅天下
列聖承統遂康區中漸濡丕冒掩軼前載弘茲道以騰
英聲煥大文以耀中古惟此鴻業屬於冲人荷無疆之

丕構託於兆人之上晝惕宵儆怒焉如疚抑惟宗社儲
休神祇協力克靖內難恢復皇綱思布和以立極爰正
風於更始因體元紀號之典舉肆青覃恩之命昭我恤
隱與人維新可大赦天下改寶曆三年為太和元年正
月十三日昧爽以前大辟罪已下罪無輕重已發覺未
發覺已結正未結正見繫囚徒常赦所不免者並除之
惟十惡五逆及故殺人官典犯入已贓不在免限左降
官量移近處已經量移者更與量移其合復資者五品

已上中書門下速與處分六品已下任從常例選丁憂
去任在憂未赴貶所者服滿日亦與量移如故舊在上
都任經本司陳狀不必更待州府申請流貶中縱勅不
許量移者及言終身勿齒者亦與依例處分亡官失爵
各與收叙痕累禁錮並從洗滌其沿去年十二月十八
日坐累流隸者不在此限應沿上陵制度及喪儀禮物
宜委中書門下及諸司長官博詢故實務遵禮度必信
必誠副朕哀懷所沿山陵造作及橋道致頓所並以內

庫錢物充用如不足以度支戶部錢充京兆府今年夏
稅青苗量放一半太皇太后第二等已上親大行皇帝
皇太后第一等親委中書門下量材叙用九廟子孫陪
位者各加兩階仍據始封每王後與一人出身委宗正卿
檢尋圖譜取一房最沉翳者充數具名聞奏内外文武
官及諸色人任上封事極言得失無有隱諱天下諸色
人中有賢良方正能直言極諫者及經學優深可為師
法詳閑吏理達於教化軍謀宏遠堪任將帥者常參官

及州牧郡守各舉所知無人舉者亦聽自舉並限來年正月到上都今年正月上皇太后尊號及撰即位寶冊文承旨宣制等官各與一子正員七品官江王府官去年十二月已前在任者並與進改其去年十二月九日立功將士普恩之外三品已上更賜爵一級四品已下更加一階其赴難將軍軍使兵馬使都虞候將士等各與改轉名銜聞奏

開成改元赦

朕以寡昧祇奉昌圖兢業為心不敢自怠庶乎播祖宗
之光烈致區宇之康平推誠不疑惟才是用豈謂奸宄
背德宗社將危中外叶謀咸加顯戮知人則哲雖在帝
以猶難罪已興懷誠為君之不易緬慙上理良用惕然
是用因元正御正殿首明罪已乃布鴻恩王守澄累朝
掌任久握禁兵陳力雖多僭誤難掩交通雜類引進姦
邪專弄威權蠹害時政鄭注李訓引見竊恩二三舊臣
誣陷非罪誠於寡昧抑其有由遂使姦惡構連禍起前

殿王涯賈餗舒元興李訓宰輔股肱叶謀不軌王璠郭
行餘節將在京率兵上殿羅立言李孝本紀綱臺府深
入領徒韓約誘金吾衛兵立成向背魏逢驛騎來往鄭
注自出成師將相通謀情狀咸具上天降祐氛祲已消
討其本因以正刑辟王守澄既已云亡難議深責特進
已上官爵及實封並宜削奪釁已終於既往思宜覃於
有截可大赦天下宜改太和十年為開成元年自正月
一日昧爽以前大辟罪已下罪無輕重常赦所不免者

咸赦除之其左降官量移復資及才用足稱者中書門
下處分流貶人中元勅不許量移及終身勿齒者並與
量移其去年因沿朋黨連累并十一月二十一日坐罪
流貶者不在此限其身亡伏法者委所在州府量給棺
殮任所親收葬制服其戶部度支鹽鐵應有諸色欠負
太和五年以前者並放免諸道賀正端午誕降賀冬進
奉起今權停三年其錢充紐放百姓兩稅所在除藥物
口味茶果外不得輒有進獻百司及諸道應宣索製造

一物以上並停三年京畿百姓兩稅已降凡一歲之內徵取者并百官職田並全放一年其京兆府一年所支用錢物斛斗等並勒鹽鐵以開成元年直進綾絹充還同州河中絳州去年旱歛賦稅不登宜放開成元年夏青苗錢同州賜雜穀六萬河中絳州共賜十萬石委度支部見貯粟麥充賜三省九列御史臺選黜陟使人視問風俗進賢退不肖興行新制務令通俗天下鎮戍文武帶憲官者解補進退並須奏聞其邊州令置譯

語學官常令教習以達異意外文武官及諸色人任
上封事極言得失有補時政者必加升擢待以不次其
有藏器待時終身岩穴竒節特行可激風俗者委常叅
官及所在長吏各以名聞文武之道合而無濟勳臣子
弟有能修詞務學應進士明經及通諸科者委有司先
加獎引河朔節將以州縣歸國者張茂昭田弘正程權
各與一子官子弟堪任使者委中書門下量加引用應內外
文武官進階加爵有差

改元廣明詔

朕祗膺寶命嗣守丕祧夙夜一心勤勞八載實欲驅黎
元於仁壽致華夏以升平而國步猶艱羣生寡遂災迭
荐起寇孽仍臻竊弄干戈連攻郡邑雖輸降款未息狂
謀江左淮南瘡痍既甚湖湘荆漢耕織屢空言念疲羸
良深軫惻我心未濟天道何如賴近者嚴勅師徒稍聞
勝捷皆列聖之潛祐寧菲德以言功屬節變三陽日當
歲首仍御正殿爰命改元况及發生是宜在宥繼業守

文之主握圖御宇之君必自正月吉辰發號施令所以
垂千載之懿範固百代之洪基莫不由斯道也可改乾
符七年為廣明元年

改元天復赦

門下三階彗孛暫移宸極之尊兩耀暗昏始表忠正之
救朕臨御寡德妖孽殊常蒙塵於便殿之中受制於逆
臣之手奪璽換指備肆侵凌挾刃砥胸幾罹酷毒閉關
行偽則公卿不在其謀懸榜見誣則黎庶不堪其詐害

我骨肉殺我嬪嬙悖惡滔天古今未有側陋嘗膽幽害
下宮皇穹降悔禍之靈將相竭同心之德鳳翔節度使
尚書令岐王茂貞鎮於右輔首激剛腸有食失匕筋之
驚有車及蒲胥之怒闕內之沉幾貫日剛納衛兵夷門
之忠憤凌雲顯懲邛吏三藩唱義四海協詞咸以密謀
咨於正相於是禁軍之內三傑挺生上玄假以良時高
廟付其英斷月正元日新正吉辰質明而逆首梟懸中
旦而克渠剖裂共申匡復皆著功庸尋下詔書通行賞

典而茂貞既平國難來覲天庭驅武旅而簞食爭迎駐
皇都而秋毫不犯推殊功以薦同志留愛姪而董雄師
繼筠能稟規程肅清輦轂人神洽慶華裔偕來亦既十
旬暨於初夏朕以脫於幽辱復正宸嚴重守寶圖不改
舊物上媿於列聖下慙於兆人思弘蕩穢之恩仍草紀
年之號庶明有罪皆在朕躬可大赦天下改光化四年
為天復元年四月十五日昧爽已前大辟罪已下罪無
輕重已發覺未發覺已結正未結正繫囚見徒常赦所

不原者咸赦除之惟十惡五逆屠牛鑄錢合造毒藥故
殺人及持杖行劫者官典犯正入已贓兼以踰濫身名
冒優官秩及刑獄之內官吏用情致成冤濫不問有贓
無贓並不在原免之限其劉季述王仲先王彥範薛齊
握同謀凶逆徒黨支屬追宥未到者不在赦原之例其
踈遠親屬素不通連衆知良善一切不問其左降官非
與十一月五日交涉者並與量移元勅不在量移者亦
與量移已經量移者更與量移近處其情非蠢政心不

挾邪曾經兩度量移者便與復資委中書門下酌量處
分流人及降流者與移近處如已收叙者量才叙用其
左降官與流人已達貶所者或至亡歿家口欲還及須
歸葬者任從便如孀幼孤窮不能自濟者則委所在州
府量與優恤發遣先有官者各還本官上帝降靈將安
丕祚中朝多難爰有純臣登好爵以報殊庸尋行令典
錫嘉名而溥大慶用表洪勲靜海軍節度使檢校太保
平章事李系昭嶺南西道節度使檢校司徒平章事李

繼誨寧遠軍節度使檢校司徒平章事李彥弼並早恭
禁衛累著勲勤生知忠孝之源洞識君臣之義齊心懋
血果成復國之功左袒一呼遂定安劉之業叔姪繼先
臣之烈彥弼稟大父之規據其大勲曠古難比宜加美
稱以播無窮繼昭繼誨彥弼宜賜號扶傾濟難忠烈功
臣各加實封一百戶六軍將士並賜號竭忠定難功臣
應接前左右神策及諸軍并鳳翔興德兩道立仗兵士
等各委所司准例各與優賞以報勤勞宰臣司空崔允

揮涕入朝含酸泣事防切發於超翔之際但勉謀於譚
誼之間明大直若屈之機見反經合道之旨忠臣愛我
奮不顧家始則裂帛為誓合契禁軍班列之臣忠良景
附再安宗社寧愧古賢雖已疇庸未為報德宜賜回天
興祚平難功臣并加實封一百戶仍圖形凌煙閣功著
定傾名高死難永言風烈詎廢賞延故尚父子儀贈太
師晟贈太尉秀實贈太保城贈司徒杲卿贈太師真卿
張巡許遠南霽雲等家有主祭祀本房子孫中每家各

與一子九品正真官功格一時賞延後嗣既配廟廷之
享仍傳榮戟之門所以勵仗節於千秋勸能臣於百代
况新誅叛黨尤景英風武德貞觀以來歷朝配享功臣
及安金藏等宜委中書門下各搜訪本房主祭子孫第
其勲蔭量其人才各與叙用其有進狀叙陳者委所司
磨勘不得令有僭濫闕畿不守先帝西巡惟我輔臣首
圖義計而故收復京城西面行營諸軍都統鄜夏節度
使李思恭揚威北鄙決勝東橋佐鄭畋匡復之謀倅岐

陽統制之命提戈奮勇運策摧兇終成逐雀之功顯就
回鑿之計逮予初位尚洽嘉謀追躡宗勳宜膺廟食其
鄭畋已有別勅處分其李思恭宜委中書門下特與加
賻仍配享僖宗皇帝廟廷故西面行營副都統涇陽原
節度使程宗楚故收復京城行營都統行軍司馬前朔
方軍節度使唐弘夫各持將節來佐台旌爭鋒而深入
王城力屈而銜冤寇壘莫覩歸元之貌空留不朽之勳
言念竭忠更隆茂典宜委中書門下並與追贈故南面

招討使天平軍節度使曹全政頃當強敵克振奇勳彎
弧百戰於陣前奪槊橫飛於馬上天時莫救壯氣空存
宜從超等之褒用勸百夫之特委中書門下優與嘉贈
有客之詩前經具載繼絕之義歷代所先言念於此豈
忘舊典介公鄒公各與一子九品正貢官其二王三恪
後各委有司准舊制修建夫匡國之臣歿身無悔所祈
後代雪彼沉寃太和七年故宰相王涯已下二十七家
並見陷逆名本蒙宥有遂令忠憤終被寃誣六十餘年

幽魂無訴宜加恩霈用慰泉扃宜並與洗雪各復官資
如有子孫在人家隱藏者任自詣闕及州府投狀如非
虛謬則與量材叙用故鎮海軍節度使李順節頃歲姦
邪亂政慨慷不平偶洩藏謀遂罹橫禍仍遭誣構被以
罪名雖已行昭雪之文未降褒崇之命宜申縟禮以慰
忠魂委中書門下優與追贈寢園之內充奉之間夙夜
兢憂應有遺闕其諸陵臺令委中書門下切加選用仍
令所司給與優料段丁栢子不得別有役使功須陵料

以待栽植其每年奉陵諸縣差配芟刈人夫不少殊不
切用徒為勞擾自今以後但每年芟薙之時委京兆府
於本縣苗稅錢數內酌量功價及於陵令遣自和崔人
夫委拜陵官常加檢點其下宮宇舍委宗正卿京兆尹
差官縣司同加檢點修飾務致尊嚴維城之重本支之
良叙敦是先渥恩當厚其宗室子孫自興德行在及光
化元年所放出身及合許非時而叅選者並委本司准
舊例處分施行切令詳實不得致令踰濫仍令吏部切

加磨勘修集之人辛勤可閔訪聞旅食動必逾年皆是
吏曹及門下省因循致茲留滯始於磨勘遠至進黃自
冬涉春不得了絕自今委中書門下切提舉吏部一事
已上並須准舊例程限不得致有淹延自兵興以來吏
道全削辦已及期者或衆人恤者幾希遂使桑柘日摧
荆榛歲茂將救黎元之命宜求撫字之仁應兩京畿赤
縣委中書門下切加選擇務在得人諸州府縣令錄宣
三道不得輕有注受切須審以才材畿內編人久罹兵

草雖連年豐稔而尚困艱貧念彼瘡痍宜加惻隱應光化元年二年三年秋夏稅合輸納屬府州縣及諸州斛斗草錢等所有逋懸並宜放免不得輒令官吏尚有追徵其去年秋所欠即不在此限郊圻之內兵革以來言念凋殘固宜矜憫差徭人役須羅撓人在司局中之人又宜集事其京兆府每月合差赴飛龍掌閑雖是輪差諸縣不免長撓疲人宜令府司於苗稅錢內每月據所差人數目每人支錢送付飛龍司仰自和雇人夫充役

途路所先通商是切關畿之地橫賦非宜致物價之益
高自商徒之難濟令鹽鐵司及兩神策軍先有兩市雜
稅並令停罷自今以後畿內軍鎮不得擅於要路及市
井漂渡妄置率稅雜物及牛馬猪羊之類其有違犯者
有人糾告以枉法贓論之鎮縣節度級及諸津渡訪聞
每年興欺百姓廣有邀求致令滯停切念兩軍京兆府
差人覺察顯行痛斷都市之內屋宇未多聞浮造之人
常須更出地課將期招算宜有指揮應諸坊於公私地

內浮造屋宇每月地課不得更有收徵旬服生靈正當
彫瘵太倉輸納務在均平儻容厚歛之姦頗失憂人之
意自今後太倉所納斛斗仰司農卿准舊例坐掌校量
之際切在奉公不得先任吏人抑屈百姓且朝廷舊
制止有權酒喪亂以來遂行賣麩本自度營利近年無
借兩軍畿甸之人皆言不便所宜徇衆不廢贍軍起今
年五月以後京畿內任自制造私麩仰度支京兆府依
舊例於酒店量戶大小逐月納權沽錢仍酌量隨月依

前借軍諸司充諸色支用其兩軍元造麴制下後便勒
逐斤減價六月三十日以前貨賣官麴其私不得更貨
賣至七月一日以後不得更賣官麴之限爰自亂離殆
將二紀闕畿之內掠奪頗多遂令黔首之徒或被丹書
之辱勝茲寬抑須杜姦宄舊務買賣奴婢皆須南市署
出公券仍經本縣長吏引檢正身謂之過賤及問父母
見在處分明立文券并關牒太府寺兵戈以來條法廢
壞良家血屬流落他門既遠家鄉或遭典賣州府曾不

尋勘豪猾得恣欺凌自此准京兆府並依往例處分兩
市立正印委所司追納毀棄改給朱記行用其傳典賣
奴婢如勘問本非賤人見有骨肉證驗可據其賣主并
牙人等節級科決其被抑壓之人便還於本家委御史
臺切加察定其天下州府如有此色亦仰本道觀察防
禦刺史各行條制務絕沉寃堯懸諫鼓禹拜昌言在明
哲之尚然實古今之所重况乍祛蒙昧希欽和平思蹇
諤而若療朝饑雖激訐而亦不加罪諫官舉職須務濟

時其文武常叅官素懷術業者任上封章極言得失必當召見親問所陳其有才識幽深事裨時政者加職升擢或箴器俟時隱於岩谷者委文武朝官所在州縣以行實聞薦舉衆目者實資於綱領摠庶務者必究乎本根將尋沿革之宜諒繫張弛之道其有事不稽古官不易方欲正濫原須遵故實應有諸司法廢制墜多時未復舊規者自今後宜委諸司各檢舉條錄聞奏委中書門下詳酌處分漢徵極諫晁董陳理亂之端晉策能言

詵立貢闕遺之政乃登道廣請舉公平誠在得人以匡
不逮應天下諸色人中有賢良方正能直言極諫博通
墳典達於教化軍謀宏遠政術詳明者文武常叅官及
諸道節度觀察等使具姓名聞奏薦至十一月到京朕
當親臨策試擇其可否施行鮫背燕毛禮經所重即驗
頒繫漢詔所矜克存尚齒之規免致遺年之誚天下高
年鰥寡八十以上委所在長吏切加安恤其有不幸者
量與葬送仍存撫孤裔嗚呼文王羨里克建周邦太甲

桐居用興殷道朕不敢忘大甸之辱公侯宜獎成萬代之功進忠賢以啟政途黜邪佞以懲覆轍庶乎上下共保我高祖太宗之洪基

改名

武宗改名詔

門下王者照臨萬寓名豈尚於難知敬順五行理宜避於刑剋徵諸前史義實炳然昔大漢之興洛旁去水所都名號猶乃避之况我國家運昌土德豈可常以王氣

勝於君名所以憲宗皇帝繼明之初實以捨水必存冥
數叶於貞祥漢宣帝柔服北夷恢弘祖業功德之盛侔
於周宣御歷十年乃復美稱朕遠推漢主之事近稟聖
祖之謀爰擇佳名式遵令典庶承天意永保鴻休宜改
名為炎仍令所司擇日分命宰臣告天地宗廟其舊名
中外表章不得更有迴避布告遠邇咸使聞知主者施
行

會昌六年二月十二日

臣聞運行之道實本於維新稱謂之尊必資於前兆此

天人相與之明歷數陰陽之祥恭惟烈光布在方策伏
惟仁聖文武章天成功神德明道皇帝陛下仁深九有
道冠三無紹列聖而垂休奄百王而邁德六氣雖序重
之以調均五音雖和資之以損益使刑刻自消於聖歷
陰陽未遂於洪爐亦猶周樂去金以享大年之兆漢都
罷水用洪繼代之光此皆九廟之靈兆人之慶臣等官
叨近密職奉絲綸抃躍之誠倍萬常品謹奉制如右請
奉制付外施行

唐大詔令集卷五

欽定四庫全書

唐大詔令集卷六

宋 宋敏求 編

帝王

尊號批荅

先天二年不允上尊號

依王公等請上尊號制

荅朝集使蔣欽緒等

荅侍中裴光庭等

荅再請表

荅三請表

肅宗荅右僕射裴冕

太上皇荅皇帝上尊號誥

太上皇再荅皇帝上尊號及讓大聖字誥

太上皇荅上尊號並辭大聖字誥

太上皇荅上尊號并大聖字誥

太上皇允上尊號誥

寶應二年上尊號答詔

答第二表

答第三表

答百寮請復尊號

永貞元年答宰相上尊號

元和二年答宰臣請冊尊號第三表

元和十四年答南百官上尊號

答宰相請冊尊號第三表

答第四表

長慶元年答宰相上尊號

答第二表

答第三表

答第四表

寶曆元年答宰臣上尊號第四表

太和六年答中書門下上尊號

會昌四年荅宰相上尊號第五表

大中元年荅百僚上尊號第三表

大中三年荅宰相上尊號

咸通十年荅上尊號第四表

光啓元年荅上尊號

荅第三表詔

尊號批荅

先天二年不允上尊號

用觀上古之主惟稱帝王一字秦漢以來乃兼皇帝朕以
薄德嗣守寶圖乾乾厲惕懼不克堪豈自崇飾以招譴咎
雖迫公卿之請終負平生之心所請加尊號甚無謂也

依王公請上尊號制

蘇頌題

門下朕聞天授命者為天所予人歸德者為人之主故
崇高有莫大之尊司牧有非常之號蓋承天敘而立人
極也我唐丕業冠開闢之初朕以眇身託元元之上紹
休聖緒欽若昌圖戢多難而極綴旒蕩羣兇而夷觸柱

下安區宇上戴君親朝廷以乂家國以治斯又叶天心
而從人願也太上皇釋海內之重負官公私之遠情以
朕功宣提劔運膺當璧爰奉睿謀揔親庶政日慎一日
問安以慶於三朝為子為臣順色靡遑於五讓虔共若
厲寢興是祗賴遐邇宅心戎夷內面莫敦風於寬大思
致俗於仁壽而王公卿士獻書草議陳帝王之錄考天
人之符迺以鴻名加於菲德然則徇至公之議難以私
拒當至誠之請不可詞奪涉川罔濟當宁興懷敬遂禱

祈益增寅畏所請上尊號曰開元神武皇帝者宜依有
司可消日練辰虔告郊廟詳諸舊典備禮進冊布告天
下咸使聞知主者施行

先天二年十一月十五日

荅朝集使蔣欽緒等上尊號

開元聖神文武

禮貴正名法無虛美朕以薄德嗣守丕圖常恐不逮安
敢自足今羣岳稱引衆善勞加榮號聞之增惕奚可當
仁惟聖與文焉得輕議况太宗睿宗俱稱聖謚予末小

子安敢同之宜斷來表

開元二十六年

荅侍中裴光庭等同前初表

卿等思致君堯舜欲加號聖文朕內省虛懷安敢當此
又太宗睿祖皆有聖謨纂承祖號安敢同稱幸體朕懷
宜斷來表

荅再請表

聖文之名稱號所極卿等致君堯舜亦宜導以冲撝超
駕前王彌增夕惕豈朕好譽之心內致自矜之色外形
招此假詞以相虛美靜思反照撫事求心詩云我心匪

石不可轉也幸悉所守即斷來章

荅三請表

惟聖與文洪名極稱內省虛缺安敢冒承匪石之心已
具前荅方與卿等上調元氣下遂蒼生致削浮華化歸
敦樸升崇高之號去滿假之端勉建皇極以迎天祐悉
此至言宜斷來表

肅宗荅右僕射裴冕上尊號

朕以眇身敬承明命兩遭狂徒擾亂宗社不寧稟上皇

至聖之謀當仗鉞秉旄之任六師一振殘孽無遺上皇
厭彼代紛棄茲人事萬邦之重畀付朕躬傳授寶符乃
加徽號朕再三固讓實增倬恭膺典策感慶良深覽
卿等來章倍加祇懼依卿等所請

至德二年
十二月

太上皇答皇帝上尊號誥

昊穹垂祐宗社發祥靈在齡年素彰歧嶷洎乎問寢日
增孝敬吾久勤庶務常奉至真特好冲虛尋將付託爾
以華戎銳士構定神州功乃格天德惟邁古是用援茲

國寶加夫大號典章弘集喜慰盈懷實惟道企前王何
必志在讓禮克承丕業以副至公即斷來表

太上皇再荅皇帝上尊號誥

三朝問禮五讓丕圖用殷后之師載勩牧野同周王之
步來入鎬京美映縑紉功侔造化命之守器加以鴻名
歸景運而有融當樂推而難拒予棲神道要養志真元
邦家又寧自多愉悅

太上皇荅皇帝上尊號并讓大聖字號

天地肇啟皇王聿興故三王垂御圖之迹典墳著牧人之要爰立邦家其來尚矣子承百王之遐運繼五聖之不業亭育區宇寵綏蠻夷罔不率從多歷年紀頃者姦臣煽禍中原構釁汝睿略懸於兩曜鴻勳格於九天終古莫儔上天是賴故加之大聖建以宗名用膺多福何所與讓予夙達古妙遠寄真宰凝神澹泊足可自怡至於宗廟陵原常展慶矣郊禋豫動固陳儀焉方期仙於上境已遺滌於中域汝欲歸尊於父實在因心爰及朝

臣亦同懇願且無為於冲漠又何取於徽名宜悉此懷
用全至道耳矣

太上皇再荅上尊號并辭大聖字誥

古者華胥大庭神農黃帝淳俗歸於太素正真契於無
為雖不累煩纓亦宗其稱號吾久尋玄旨遠襲仙宗既
欣襄野之遊更樂瑤池之宴倏然自逸豈在尊名爾親
率百寮至於再請則蒸蒸之孝實冠於當今而蕩蕩之
德獨慙於上古頻覽章表懇志難違汝寶命維新鴻勳

允集用加大聖之號克副昊天之心若承命無渝萬國
同歡於翼戴儻固辭不已吾亦有未膺乎冊典勿為名
讓宜協至公朝野之情固多榮幸也

太上皇三答上尊號并辭大聖字誥

道高者必傳其迹德著者必享其名汝廓淨妖氛載安
社稷萬靈式叙豈非大乎兩儀交泰豈非聖乎吾所以
親受寶符自題徽號寧惟對於列辟諒已聞於率土渙
汗之出理不可收締言之行事必有在將固撝謙之道

是違億兆之情天地神祇未以為當宜膺景命即斷來
章

太上皇允上尊號詔

汝孝以奉親明以御宇上從君父之命下徇黎元之
請既弘茂實爰副洪名于后攸高百王是式循環章奏
嘉慰可知予思每集虛心恒遺照方契真宗之旨豈云
稱號之榮汝就養無違歸尊有恪再獻從龜之吉復當
乙巳之辰已備典章當依來請

寶應二年上尊號荅詔

朕嗣守洪名欽承丕構克清多難奄旬萬方聖靈在天
玄德敷祐南面恭已朕何有焉巨猾削平非予之武言
念海內生人至艱兵鋒猶虞暴骨未掩日旰忘食宵分
疚懷遽稱成功良謂虛美玄宮甫畢豈期即及改元寶
位至尊何以更言加號宰相之任職在匡弼進勸之詞
深所不取

荅第二表詔

朕內省德薄在於人上紹高祖太宗之天下承上皇先
聖之不業惕然南面常懼君難豈因樂推亦自光大况
山陵甫爾濡露增懷寓縣凋殘薰風未暢遽行古制虛
受鴻名是用繹思未宜獻可五始之義誠在體元三年
之道以其無改所陳徽號亦有舊章若更尊崇得非自
聖股肱輔弼惟欲致君空動誠請之詞未副昌言之理

荅第三表詔

年叶五紀成歲以授時君臨萬邦向明而聽政體元不

潤其色處實不為其寘朕若昔大猷允懷恭已務於簡
易豈曰宗高常深負荷之憂敢忘祖宗之烈卿等總括
羣議昭升舊章周爰典籍之文鈎校天人之理對揚耿
命進勸皇圖請踰年而改元益正位以加號敢廢春秋
之義用諧啓沃之心敬允乃誠良多慙德

批百寮請復尊號表

三省來章彌用兢惕再宗大號何以當之前者示懷蓋
非冲讓尚勞敦請豈所宜然卿等博學古今列於朝右

思弘獻替共致太和豈以虛名重子不德再三循省增
慙於懷想爾深衷勿更陳請

貞元
六年

批荅宰臣請上尊號

伏以高祖太宗接千載之統垂無疆之休太上皇承九
聖之烈傳莫大之慶嗣德纘業允文允武弘帝堯之欽
明宗立元之清淨付朕天下頤神保和至道光於唐虞
至仁合於天地卿等虔述休德祇獻鴻名循省再三允
符朕意朕獲守寶位丕承睿訓雖虔恭寅畏不敢怠遑

而澤未洽於羣生理未臻於皇極遽言徽號何以當之
雖嘉乃誠難遂來請其上獻太上皇尊號宜依所奏凡
百卿士當體至懷

批荅宰臣請再冊尊號第三表

朕獲承丕緒以撫萬邦照臨無日月之明膏潤無江漢
之浸常恐吉蠲雖備未享於天心教道雖勤未諧於人
欲諒慙匪德敢議鴻名而宰臣羣公宗后庶尹上引祖
宗之不矩下述黎獻之誠心誠子以處恭而思勞告子

以愛名而務實陳以懇迫至於再三先典不可以固違
羣情不可以屢阻與其守讓而繁飾不若納規而徇公
遽抑至懷勉從來請顧惟不稱兢惕殊深

元和二年十
二月二十二

日

荅南省請上尊號表

朕纂嗣洪業託於王公之上常恐涉道猶淺燭理未明
夙夜祇畏罔敢寧逸至於法天象以垂制順人心而平
亂立刑辟而不峻興禮教而不倦簡黜澆薄延納忠直

思濟於道保合太和今寰海削平載戢弓矢皆賴輔弼
之臣盡規於朝廟將帥之畧宣力於邦家循省表章請
崇徽號武功文德揚美於子用愧於懷何以及此尚以
昆夷未服邊鄙猶虞不敢允從宜即斷表

元和十
四年

荅宰臣請冊尊號第三表

昔我祖宗每崇徽號皆以道侔天地澤被生靈故請之
不疑而受之不愧是謂典禮鴻光赫然朕以寡昧祇承
寶位虔恭惕厲不敢荒寧常懼禮化未敷非以自尊為

意若蕩清寇孽修舉政刑此乃中外英賢叶心所致復
於前疏亦已言之卿等善則稱君過陳功德表章三至
益愧於懷豈大體之必然何懇言之不已沉吟終日未
果允從

荅第四表

建崇名加大號必自盛德而因全功苟非其時難以擬
議朕紹十聖之統緒遵百代之憲章冕而事天憂勤不
暇乃者忠臣敦化良將策勳有寇難而必蕩必平用兵

戈而不蝗不早此乃多士叶力成此小康豈予一人獨
運而致卿等四陳章疏每懋肺肝表士庶之誠心徵朝
廷之故實願飾虛美皆為過談諭而復來勢不可止雖
重煩典禮殊不自安而深念奏陳亦當從允勉依所請

良用愧懷

元和十四年
六月七日

批宰臣請上尊號表

朕以菲德初承大寶嚴恭夙夜修己臨人燭理未明舉
政多闕雖克展郊禋之禮或未稱瑞應之符而俗尚凋

訛人未康又所患德之未立不患名之不尊至於北狄
求和西戎即叙南越投戈而率化東夷繼踵而來王不
候七旬之期自銷積紀之弊此皆祖宗垂祐公卿叶贊
之力也朕何有焉遽議虛名深愧未稱卿等志思將順
誠切忠君宜體至懷勿徇虛美

長慶元年四月

批宰臣請上尊號第二表

元稹

朕聞天職生植聖職教化天職舉則四時行聖職修則
萬方理然而天不以行四時而為德故蕩蕩無名聖不

以理萬物而為功故謙謙不宰顧朕小子獲承丕圖上
賴祖宗之靈下託股肱之力先定鎮冀次來幽燕皆吾
日月之所照臨車書之所轍迹失之則有以自愧得之
則何足以自多况今四方雖清物力方困六戎雖伏邊
備尚勞百吏雖存官守多曠萬目雖設紀律未張有此四
者不敢遑寧思與卿等夙夜俾乂卿宜為我提振大法
修明政經讐竄戎狄康阜黎庶四者既理名焉用哉朕
方以臯夔之務委卿卿宜以堯舜之事教朕驟加徽號

深恥近名循省表章難徇來請

長慶元年四月

批宰臣請上尊號第三表

元稹

昔齊桓議封禪管仲驟諫其未宜晉武平江東何曾深
惟其遠馭彼二臣者居安思危之志明有犯無隱之誠
切也况朕寡德謬膺昌期賴先帝削平之威蒙列聖寢
漬之澤聿來燕翼克靜華夷既無德而有威實以祥而
為懼卿所宜朝夕納誨警予荒寧雖休勿休日慎一日
而乃過為溢美頻上鴻名諒多丹赤之誠殊非藥石之

愛汝為子礪為朕揣摩汝為子舟為朕康濟強我懿號
不若致我為有道之君加我虛尊不若致我於無過之
地宜罷來請用副乃懷

批宰臣請上尊號第四表

元稹

朕以元月正日祇見於廟對越於上玄千官在前萬乘
居後觀聲名文物之盛望城社宮闕之尊尚念高祖太
宗艱難於營制德宗憲宗殷勤於績復懼不克荷以羞
前人寅畏嚴恭或真無過而燕趙底定戎獯和寧實惟

列聖之休安敢自大其德左右輔弼庶尹師長猥以鴻
名願加薄德三詔執事抑而未行物議逾堅予衷未信
四陳章表備列古今且曰告虔之時寧忘繼志問安之
下胡不畏心事有切於顯榮理難從於固執於戲允恭
克讓既見奪於羣情克己為仁庶自勤於三省勉依來

奏深用愧懷

長慶元年
五月某日

荅宰臣上尊號第四表

前三章皆有報旨推本帝王之道研究天人之際可

謂盡矣能無諒哉朕辭愈堅來奏愈懇考著龜之意酌
卿士之心義貴從人事難徇志然體未濟之象警慎將
然復大畜之文模法往行虞舜勤民以恭已文王事主
而小心自厲則鑒乎殷湯盤銘持盈則戒乎周廟敬器
還珠却馬使無愧於前賢菲食罷葦有示於來世率
是道也庶無悔乎勉遂羣心祇循祖訓敬允誠請愧惕

良深

寶歷元年
四月三日

荅中書門下上尊號

朕以菲德纂承睿圖業業乾乾懼不克荷是用發天地
無私之道以成化象日月無私之照以燭幽慕唐堯虞
舜之為君繼貞觀開元之致理朕以夕惕宵興不遑暇
逸冀將昭復聖哲保綏華夷至於鴻名尤不輕議尚未
審度豈可屬心卿等台鉉重臣翼宣元化宜匡朕志臻
於緝熙今陰雪傷和尚資寬宥乃以文武至德加於朕
躬省視奏章難從虛美宜斷來表深諒予懷

大和六年
正月七日

批荅宰臣上尊號第五表

前覽四表報皆一詞可謂君臣之義至矣天人之理盡矣朕辭益固卿請益堅誠獻可之不移奈虛美而難處山雖崇而降地易象明言海雖大而下川玄元深旨文王以小心事帝虞舜以恭已臨民盤銘取勵於殷湯欵器戒盈於周廟皆以畏惕而自警不聞滿足而虛尊卿等以塞北平戎山東殄寇韜兵偃武鑄戟為農郊天之年瑞雪清路冊號之夏嘉雨滅災毀摩足壞法之刑蕩并寇亂常之暴比皆上玄厭禍宗社儲休至於刑政克

明文武具舉年登適臻其氣順俗阜實自於官修內承
宰輔之謀外盡藩侯之力余雖垂拱且有何功况增鴻
徽尤非稱德既頻推美何以當之然體貴從人事難徇
志祇循前訓允遂羣情殊不自安諒非縱欲勉爾所請

深用愧懷

會昌四年
十月七日

荅百僚請加尊號第三表

朕獲承丕緒奄有萬方憂物之心常懷惕厲荷天之力
漸至教寧比中外元僚文武庶政咸有一德以匡冲人

而卿等猥以鴻名加於菲薄拜章瀝懇至於再三伏念
自列聖以來何嘗無今日之請然率不能讓者上慰宗
廟之靈下迫羣臣之願粵予小子豈敢久勞卿士之心
哉敬允乃誠良深自愧所乞宜依

大中元
年十月

荅宰臣請御丹鳳樓上尊號

勅旨沒陷河隍百有餘歲中原封界咫尺戎疆累聖含
容久勞征戍伏思元和中將攄宿憤常欲經營屬誅鋤
叛臣未暇收復今則恭行先志克就前功不遠徵兵不

勞財力二州之外無得七關又取維州粗成邊業尚以
息民解甲未收山外諸州且以肆菁申恩所以頒示天

下其御樓依所乞

大中三年十一月二十五日

荅宰臣曹確等請加尊號第四表詔

夫功合天者稱皇德合地者稱帝皇帝二者朕已享之
况孤寡不穀之名靡尊於玄祖明皇孝德之號久慕於
冲人業業兢兢惟懼不稱南蠻未誓師旅尤屯東寇雖
平瘡痍尚大方將罪已曷敢矜功卿等修德銳於臯陶

恥君不如堯舜鋪陳故事增飾洪名謙恭愈堅表章疊
至對揚之際忠懇彌彰弘我以奉先勉我以從衆亦念
乙酉之歲堅請不逾今復固違以矜小讓名實不副朕
當不敢荒寧始終相成卿等勤於獻替勉爾來請深用

愧懷

咸通十年
十月十日

荅宰臣蕭遘等上尊號

朕猥以寡德丕承耿光宵旰雖勤兵戈繼作困生靈於
豺豕委宮闕於榛蕪罪已則深噬臍何及尚賴天地悔


禍祖宗降靈內之則公卿大臣外之則方伯元老上憑
眷祐下憫蒸黎允叶一心克濟四海廓妖氛於寓縣刻
戎壘於郊圻雖復舊都匪遑高枕嗚呼大恥才雪羣生
未蘇文武典章墜無半在威權法制行亦幾何土疆徒
繫於地官征賦罕歸於國帑肅恭常祀尤在正辭昭格
上玄寧容溢美卿等同匡艱運當識深衷加以虛名斯
為不急步驟錙銖之際自有至公照臨顯晦之間寧資
外獎當勤納誨宜斷來章

光啟元年
五月某日

荅第三表詔

朕以寡昧嗣守丕圖思臻太和不敵寧處干戈載戰稼穡少登禮樂中興聲教遂被是用郊上玄以報本解密網以緩刑豈非九廟降靈羣賢叶力共贊薄德致茲少康永惟眇躬實懼虛飾卿等上稽天意下採人謠旁訪典謨俾奉明訓以為天地之道既不讓於強名皇王之心宜屈已而從物累貢殷勤至於再四雖鑿井耕田未及勲華之理而樂推欣服難違億兆之情既狗衆詞終

疑溢美勉爾來請深用愧懷



唐大詔令集卷六

欽定四庫全書

史部

唐大詔令集卷七十一

十一

詳校官編修臣范來宗

編修臣裴謙覆勛

總校官編修臣倉聖脉

校對官學正臣常循

謄錄舉人臣徐元宸

欽定四庫全書

唐大詔令集卷七

宋 宋敏求 編

帝王

尊號冊文上

應天神龍皇帝冊文

開元神武皇帝冊文

開元天寶聖文神武應道皇帝冊文

開元天地大寶聖文神武應道皇帝冊文

太上皇加光天文武大聖孝感皇帝冊文

睿聖文武皇帝冊文

元和聖文神武法天應道皇帝冊文

尊號冊文上

應天神龍皇帝冊文

維神龍三年歲次丁未九月丙申朔五日庚子具官某
及文武羣臣等謹昧死再拜稽首奉冊言爰自厥初肇

興司牧皇矣撫極蒸哉察道莫不因時適變改物殊蔽
推五運而陟崇高步三微而應厯數天地人皇之稱立
始別洪荒唐虞夏帝之君尊漸詳文質姬水以推輪發
號烈山以斲耒增祥然後仁被德宣功昭業遠歷訪前
古茲為舊式大唐受乾坤之勝命當寓縣之謳歌奄有
黎庶遂光宸象應天皇帝陛下垂旒御宇截海披圖承
四業之休光握三靈之寶契虞舜蒸蒸之德永錫羣方
周文翼翼之心其凝庶績驅齊人於仁壽致雅俗於醇

釀六府咸修五戎不用航海梯山之客奉贄輸琛耕田
鑿井之夫擊壤鼓腹中外靜謐表裏雍熙而孽子滔天
亂臣干紀謀同觸瑟禍劇弄兵不虞之災忽生於肘腋
無象之鑿獨憤於神祇於時凶豎逼樓聖君憑檻威靈
下濟覺封豕之周惶醜逆上瞻見神龍之輔翼寶仗以
億千之衛天儀成丈六之容衆瑞共臨羣妖大駭盡迷
方而失據咸奪氣而忘精顧盼而斬馘輦屍指麾而冰
消霧釋雖復草為兵甲秦師驚蔣帝之神樹作藩屏釋

主屈魔王之衆虵軀之變媧后蛟影之隨漢高未足以
匹此竒徵方斯偉應自非冥符幽贊睿感潛通何以承
波若之護持享高明之福助昔者伏牛之主遂號犧皇
名鳥之君仍題鳳紀法身用馬鳴成道上士以龍德為
仙敢托元符爰資故實謹上尊號曰應天神龍皇帝鴻
猷載肇昌厯惟新庶以仰順乾心俯從人欲天長地久
更隆四大之尊名玉振金聲恒為百王之稱首盛矣美
矣皇哉唐哉臣某等誠歡誠喜頓首死罪死罪再拜以

聞

開元神武皇帝冊文

蘇頌

維先天二年歲次癸丑十一月辛酉朔二十八日戊子
攝太尉臣某等六千五百一十四人言臣聞厥初生人
首出庶物物不自理惟后所以康乂后不自尊惟人所
以歸往古先哲后安人育物表功崇號不可辭也皇矣
上帝臨於巨唐降氤氲垂耿光重熙而累盛至太皇而
授聖皇臣等敢稽首而言曰曩者景龍之末長蛇縱禍

陛下慮宗社之墜提劔夷之則因親以尊主闔朝有賊
臣天罰大慙陛下拯邦家之難援旗剿之則錯枉以舉
直戮不及嗣惡惟其身思與王公卿士等下逮元元揚
闡澤而布和氣臣又聞之軒夢華胥堯期姑射未有一
其道而順太皇之心文王昭事武王纘緒未有一其時
而居聖人之位褰裳釋重至公也端宸嚮明至孝也使
九族惇叙百工允釐東西南北砥礪聲教彼靈有四指
翠黃而可乘我寶有三指珠玉而不御然猶發揮禮樂

馳騫典墳論思獻納進善從諫日慎於一日矣上指天
意下考人謀卓哉協元符而鑠靈命而已夫開者泰也
罔弗亨元者善也罔弗利神者聖也罔弗通武者威也
罔弗服臣等不勝大願昧死上尊號曰開元神武皇帝
謹上玉冊玉璽臣等誠惶誠恐死罪死罪謹上

開元天寶聖文神武應道皇帝冊文

維天寶七載歲次戊子五月庚午朔十三日壬午攝太
尉銀青光祿大夫守刑部尚書兼京兆尹上柱國潁川

郡開國公臣蕃昊及文武百僚等謹稽首奉開元天寶
聖文神武皇帝陛下臣聞惟道至大王者均其名惟天
不應聖人光其德陛下弘啟玄宗紹開皇運淳化既洽
勞謙有恒每滌覽真經虔心明祀將以荅三靈之睠命
為萬姓而祈福故得玉芝敷白魚見卿雲降仙傳對揚
之休必有不可讓者也於是公卿宗子耆艾法流詣闕
奏章願增徽號至於再至於三伏奉甲戌詔曰禎祥者
所以合天人鴻名者所以彰德業今封章繼至誠請甚

勤敬膺神休允答人望臣等不勝大慶謹上加尊號曰
開元天寶聖文武應道皇帝伏惟開闢之功簡易之
德與道同運體乾無極

開元天地大寶聖文武應道皇帝冊文

維天寶八載歲次己丑閏六月癸亥朔五日丁卯攝太
尉開府儀同三司行尚書左僕射兼右相吏部尚書宗
玄館大學士集賢院學士修國史上柱國晉國公臣林
甫特進行左相兼兵部尚書宗玄館大學士太清宮太

徵宮使上柱國臣希烈及文武百官正議大夫檢校禮部尚書上柱國清河縣開國男賜紫金魚袋臣崔翹等謹再拜稽首奉冊開元天寶聖文神武應道皇帝陛下臣聞自昔帝王與道同功者道寶降焉與天合德者天命彰焉陛下功冠九皇德包三古而猶朝乾夕惕朝禮上清復玄化之雍熙致蒼生於仁壽故昊穹眷命烈祖垂休玉芝再產於宸居瑤圃懸記於仁洞混成徵旨允屬聖躬陛下推美廣孝克宗祖宗之禮羣臣以公議納

忠庶叶承天之意乃有卿雲散彩瑞日重輪對揚大號
固不可辭讓者也於是公卿宗子耆艾法流顯然詣闕
奉章陳請陛下猶懷謙冲之德至於再至於三伏奉景
辰詔曰陰隲既啟公議屢陳惟懷永圖敬依來請臣等
不勝大慶謹上加尊號曰開元天寶聖文神武應道皇
帝伏惟覆載之功廣大之業丕膺鴻烈寶祚無疆也

太上皇加光天文武大聖孝感皇帝冊文

維至德三載歲次己亥正月甲戌朔五日戊寅太上皇

若曰古之握乾符建皇極社稷不可無主帝王惟有歸
往堯禪舜舜禪禹畏天命也啟嗣禹武嗣文從人望也
革命易姓舉至公於國纂戎繼統用不私於親斯美大
矣朕承五聖之不業宅萬國而為君膺時撫運載將四
紀夢帝與齡實受多福曷嘗不虔恭至道亭育羣生早
厭黃屋之勤每懷紘霄之馭惟父知子我有元良惟君
安人久思付託皇帝天縱睿哲日躋孝敬率性之至通
於神明財成之道冠於宇宙朕往以蕭牆之難克保宗

社故先帝禋予以主鬯頃者中原之禍期輯邦家我於是命爾以仗鉞當經綸雲雷之際櫛沐風雨之時思契宿心累有成命而義不奉詔謙不踰尊至於再三明茲懇讓洎即戎致討觀兵朔漠驅馭豪傑用服乃功於明辟天亦集大命於爾躬推之至公終陟元后夫名以制義器以昭德今羣公卿士咸旅於庭明聽朕言敷厥成訓於戲奄有四海克康兆人光天之業也經綸天地勘定禍亂文武之功也雄圖英筭大聖也保國安親孝感

也今加徽號於皇帝曰光天文武大聖孝感皇帝授傳
國寶符受命寶符各一上副於天中契於神下叶於人三
者朕無愧焉永保累聖之鴻緒對一人之休命朕將訪
道峒山追蹤汾水超然金闕之上終以玉京之遊不其
至哉良願畢矣宜令所司擇日即行冊禮

睿聖文武皇帝冊文

李吉甫

維元和三年歲次戊子正月癸未朔十一日癸巳攝太
尉銀青光祿大夫守兵部尚書兼御史大夫上柱國趙

郡開國公臣李巽及文武官五千七百九十四人等言
臣聞自天玄而升地黃其凝皇王之道堯舜首出故典
謨述焉自堯及唐歷紀三千致理之君不過十數升平
之運不至五百天人之交際不其難歟我唐運之興昌
期是膺四海一統十聖丕承以至於皇帝則君十一而
年二百矣歷考前代丁於斯時皆王澤已竭君明寢替
未若我后之惟新厥命我唐之中興厥祚顧視周漢不
其茂歟伏惟皇帝陛下紹太宗之英武稟德宗順宗之

寅畏乾乾翼翼若不滿志故愛於文母順色之孝也睦
於兄弟因心之友也宗讜議察邇言去疑謀杜讒說俾
王道正直砥為夷塗發前聖之韞匱披人文之光耀而
氣有沴者反時為妖若黎宗之不恪苗人之逆命或誕
敷文告或震疊武功聖造不疾而速非陛下疇能之然
後奉四表之歡心總百神之受職蠲祀於清廟嚴禋於
上玄天地察而神祇著矣臣聞之君人者謙遜靜慈則
天應之以福故休祥出焉慈和愛育則人應之以誠故

鼓舞從焉王者因人心稽天意天下俱應而徽號加焉
至公之道不可辭也臣等所以勤勤懇懇至於再至於
三願奉鴻徽以彰休德陛下猶三揖而五讓之久而罔
已始降俞詔於是百辟卿士洎四方侯衛之臣上言曰
陛下誕睿聖之姿膺會昌之期經天地之謂文禁暴亂
之謂武臣等不勝大願謹奉玉冊玉寶上尊號曰睿聖
文武皇帝惟陛下懋一德勤萬邦千祿百福垂唐之無

疆

元和聖文神武法天應道皇帝冊文 崔羣

維元和十四年歲次己亥七月丁丑朔十三日己丑攝
太尉金紫光祿大夫檢校司空兼太子少保上柱國鄭
國公食邑三千戶臣綬及文武官五千七百一十八人
等言臣聞惟天惠人惟元后作人父母大寶曰位至公
者名帝皇尊稱肇自三五其義尚矣堯舜禹湯文武成
康垂於典籍為萬代法非名歟殷有天下武丁大其業
周有天下宣王嗣其訓在漢七葉亦稱盛強中興之美

與我不類皇唐統天二百有二載祖宗宗光四海一家
禮文憲章矩矱大備元符昌歷畀付有在洎我后之握
圖也齊心於穆清垂意於大寧文昭武烈冠今邁古始
負固不若者莫匪顛踣輸忠來附者克保蕃祉天寶之
季孽臣干紀靈誅亟掃餘氛未弭兵不得戢六十五年
於茲矣元和致理思橐弓矢睿謀前定所嚮風靡兩河
既清泰階砥平戴白之老欣感出涕不其盛歟伏惟睿
聖文武皇帝陛下德配天地明並日月嚴薦於宗廟盡

敬於郊裡孝通於神祇仁浹於動植內睦於九族外懷
於四夷乙夜觀書日昃聽政恤刑懋賞劭農勸學歷選
列辟英聲茂實其何以加焉日者淄青不恭告讓罔按
任下推誠出師徂征玉壘金陵之遐阻懸瓠營丘之險
域或肆於都市或懸於藁街其餘瑣細蓋不足紀上以
攄列聖之憤下以叶千齡之慶然後闢四門貞百度會
寓縣之玉帛旅梯航之貢篚咸曰不圖貞觀開元之化
復覩於今日矣陛下勞謙祇畏不自暇逸讓德於上天

推功於羣臣訪闕政修墜典不以龜龍為瑞以賢俊為瑞不以珠玉為寶以慈儉為寶卓哉煌煌信可假玄穹而蟠厚載者已是宜尊徽名膺顯號以光於典冊以順於人心以荅於天意不可辭也臣又聞之居安思危納諫從下遠讒慝旌謙直愛養黎庶敦尚樸素斯皆高祖太宗順宗之遺訓也而陛下躬行之造次必於是寤寐必於是實萬姓之福無疆之休僉曰功成而禮不崇德廣而名未稱臣子之罪也於是百辟卿士藩衛耆耄稽

首上言至於四三陛下深秉謙冲詔諭往復不得已而
從之伏以紀年之盛冠於大號厥有舊典書不云乎乃
聖乃神乃武乃文傳曰惟天為大惟堯則之則法也王
者昭事上帝取法於天道德經曰天法道道生一唯上
聖至德無則利物行清淨自然之道為能應之臣等不
勝大慶謹奉玉冊玉寶上尊號曰元和聖文神武法天
應道皇帝伏惟陛下景福是膺如日之昇雖休勿休翼
翼兢兢對越鴻名丕赫成能萬壽百祥罔不豐登天祚

聖唐惟聖丕承臣綬等誠歡誠躍頓首頓首謹上

唐大詔令集卷七

欽定四庫全書

唐大詔令集卷八

宋 宋敏求 編

帝王

尊號冊文下

文武孝德皇帝冊文

文武大聖廣孝皇帝冊文

仁聖文武至神大孝皇帝冊文

仁聖文武章天成功神德明道大孝皇帝冊

文

應乾聖壽太上皇冊文

尊號冊文下

文武孝德皇帝冊文

維長慶元年歲次辛丑七月乙未朔十八日壬子金甌
光祿大夫檢校司空兼太子少保上柱國鄭國公食邑
三千戶嚴綬文武官六千二百七十七人等言臣聞天

以萬物付聖人聖人本天意而保乂之惟犧農先天而
貞惟軒轅奉天而行惟堯舜法天而明莫不綱緼粹精
昭建鴻名以至於夏殷周漢謙儉服義仁愛忠利亦著
稱謂代濟其美當隋之末我高祖神堯皇帝救拯焚溺
應天立極蕩氛昏揚凱澤父教而母育恩德高肌骨維
天寶季歲賊臣秦常塵起幽陵毒流四方累聖含弘視
人如傷餘枿勢滋專土擅強憲宗因天時順人心舉武
經明大刑連拔堅險顛陪同惡冥冥沉沉猶恃榛穢干

戈不得息者綿六十七祀逮我后之御歷紹太宗之求
賢審官舉直錯枉體玄宗之尊師敬道清靜致理法肅
宗之循名求實刑賞用中廣德宗之亭毒含容博採虛
受而後展嚴於配天夷思於法宮從物無私推誠至公
霈矣乎廣受寂然乎感通神武不殺而天下會同昔少
康祀夏聿修皇祖之訓周武繼統務廣文王之聲爰洎
宣王克服蠻荆勞來安集洎漢光武既平隴蜀聽政忘
寐伏惟皇帝陛下以至聖之姿誕啟昌運重明之業紹

開中興豈無避違從風悅化而自草豈無氛翳大明昇
中而自除皇澤暢於九圍文命敷於萬國則向之數王
何足稱哉尚復孜孜庶本不遑勞謙日昃講道求賢議
獄恤刑去讒進直以利物勤人為政本以檢身戒懼為
化先自誠而明日慎一日是以天道惟新於景命玄德
亟聞於四方億兆咸曰大哉君心復曰懋哉君功降延
禧之主揚仁壽之風恢帝圖廓皇綱崇鴻名顯無疆不
然者何以荅上靈之眷命乎何以惠庶氓之懇望乎於

是垂白之老緇黃之衆與侯甸藩衛之士守闕稽顙日
以上請臣等所以勤勤懇懇敢固以言陛下猶堅秉撫
揖至於三四不得已而降前詔於是百辟卿士考天人
之意稽典禮之義進而言曰陛下崇儒問道恭默致化
文之明也保大安乂感懷夷夏武之彰也嚴恭寅畏博
愛廣敬孝之大也宣慈惠和忠恕利物德之盛也臣等
不勝大願謹上玉冊玉寶上尊號曰文武孝德皇帝伏
惟陛下敬天之錫昭聖之功高明有嚴慎德無窮赫赫

融融與天比宗臣綬等誠歡誠懼稽首頓首

文武大聖廣孝皇帝冊文

李逢吉

維寶曆元年歲次乙巳四月甲戌朔二十日癸巳攝太尉銀青光祿大夫檢校右僕射兼太子少師上柱國天水郡開國公食邑二千戶臣趙宗儒及文武官六千五百四十一人等言臣聞自古王者之御極也必上奉乎天地丕承乎廟祧法天地所以宅八紘嚴宗祧所以垂萬葉非休聲震越不足以齊燾載非尊稱超卓不足以

光祖宗則名實之際不可誣也肇自上古質文未具號
無三五事本羸劉其後正閏相承南北更王僉事因襲
而罔圖旌別苟鴻猷既洽徽數莫申貽諸裔昆靡所稱
謂抑當時臣子之罪非所謂納君於善者皇唐列聖備
有典常高宗而降代享丕號以至於玄宗之治平肅宗
之盪定德宗之烈文憲宗之戡剪先聖之克荷重熙累
盛震邁古昔未有不由斯者已伏惟皇帝陛下濬哲自
天克仁在躬聖齡方富睿德咸稱行懋於朱邸聲飛於

青宮始踐祚而虞舜之大孝聞焉既郊天而文王之小心著焉竭愛敬於西宮示儀型於四海慎簡名傳優寵直言自嗣位以來百度維新九圍式叙邊烽罔不罷屬國罔不來靈化有盱嚮之助風雨無伏愆之候至玄至蹟可勝道哉由是百辟羣司者儒碩士文武臣庶緇黃幼艾殊形一心異聲同辭隳肝瀝膽奉上徽稱其誠至矣吾皇猶惕然三讓不得已而俞焉斯謙尊而光卑而不可踰者也夫經緯天地曰文則二儀交泰矣克定禍

亂曰武則八蠻順軌矣格於上下非聖歟通乎神靈非
孝歟臣等恭考庶言強名聖德不勝大願謹奉玉冊玉
寶上尊號曰文武大聖廣孝皇帝伏惟陛下祇上帝之
眷命荷累聖之儲休外順四夷內從百辟時承昌運昭
受鴻名然後躬大易不已之義思禮經日新之旨鑒拜
休之至誠考無過之格言以緝熙庶績重其文以斥去
羣邪盛其武以日達四聰載大其聖以慎守九廟益廣
其孝克儉克勤有初有終所踈者佞所近者忠畋遊必

省獻替必從無忘我高祖太宗之丕烈以永家邦臣宗
儒等誠歡誠懼頓首頓首謹上

仁聖文武至神大孝皇帝冊文 李德裕

維會昌二年歲次壬戌四月乙丑朔十四日戊寅攝太
尉光祿大夫守司空兼門下侍郎同中書門下平章事
臣德裕銀青光祿大夫守尚書左僕射兼門下侍郎同
中書門下平章事臣夷行金紫光祿大夫守尚書右僕
射兼中書侍郎同中書臣珙銀青光祿大夫守中書侍

郎同中書門下平章事臣紳及文武百官金紫光祿大夫檢校司徒兼太子太保臣僧孺等六千五百七十四人等言臣聞羲皇首太古之號成湯顯聖武之稱我高祖皇王是憲尊名若古詒厥丕訓為子孫之法豈不善始善述哉矧乃巨唐受命繼體天業理運將至大君以興昊穹所以開至聖也曩者明兩未定帝華不協捨允傳聖深惟至公先后所以昭天命也亦猶堯發於唐侯文興于代邠神明之祚不其難乎伏惟皇帝陛下清明博

聖光耿四海玄德莫隣天休大賚日角見表志氣如神
爰初定命正心理物如辰居其極而天下無邪矣由是
昭德塞違尊賢遠佞禹不自滿成不敢康罔遊於田不
通於色自閏閫以施王教由家道而刑國風去比周核
名實攬權綱擇聖紀修舊典協誠質托嘉壇款太一進
正臣以端治表禮故老以求謹言遠無蔽獄近無留令
祈玄祖而膏雨降祀靈嶽而嘉穀登省刑罰而蓬宇消
發倉廩而蝨螟息去歲龍旂承祀大輅親郊捧玉瓚而

一獻光靈來格振金石而六變魄寶昭臨然猶古訓是學
緝熙於道天文炳煥雲漢其章溫恭敬遜承太任之教
和樂愷悌洽戚藩之心德風偃於羣黎威靈動於絕域
又以敬養不逮於長樂昭配未升於禰宮每懷嗣徽蒸
蒸而慕所以奉若慈訓對越兩儀因心立制永錫其教
寬底劓之罪興惻隱之心迴霜收雷為之反汗及單于
慕義景附朔邊耀德戰兵謙臨是受至於備文物展國
容莫不先甲而布甘澤丁辰而廓陰翳和景晏溫卿霽

網緼斯所謂神祇之心應矣天人之際交矣於是服冕之士戴鶡之倫暨藩衛邦伯黃髮台背不謀而進曰陛下玄默天晬輝光日新大矣孝熙四極爰臻誠宜玉版溫潤鏤鴻名之德神寶焜耀薦萬斯之年丕天大典不可辭也陛下猶謙退固拒至於三四羣臣不已乃曰俞哉夫徧覆包含之謂仁極深研幾之謂聖憲度著明之謂文變夷震疊之謂武感而遂通之謂神無思不服之謂孝臣等不勝大願謹奉玉冊玉寶上尊號曰仁聖文武

至神大孝皇帝伏惟陛下乾健不息謙尊而光樂戒其
耽禽戒其荒壽乃侔於殷宗俗乃厚於成康貽燕後昆
受福無疆臣德裕等誠歡誠懼頓首頓首謹言

仁聖文武章天成功神德明道大孝皇帝冊文
維會昌五年歲次乙丑正月己酉朔一日己酉夫守太尉兼
門下平章事臣德裕光祿大夫守尚書右僕射兼門下
侍郎同中書平章事臣悰朝議大夫檢校尚書右僕射
兼中書侍郎同中書門下平章事臣李讓夷朝議大夫

守中書郎中兼戶部尚書同中書門下平章事臣崔鉉
及文武百官大中大夫守太常卿臣孫簡等六千一百
二人等言臣等聞在昔周宣獫狁內侵四牡薄伐以定
王國則詩人大其功暨乎漢宣北夷乖亂呼韓慕義邳
支遠遁則簡冊著其美惟此二代稱為中興間者開成
之末星孛如雲螟飛蔽天先帝威之黎人懼焉乃授至
聖遺大投艱迄茲成功厥有冥數伏惟仁聖文武至神
大孝皇帝表應龍翼粹含乾剛神全而正氣凝宇定而

天光發智燭千里動必察微心鏡萬機物來斯應於是
五材用四維張建中和之極綴前聖之綱重樞機修法
制刑御家之理無出相之言銷讒邪遠奸佞斥背公之
黨退好徑之人內嚴體貌增堂階之峻外絕締交去輔
車之勢古所謂受命於天惟舜獨也已又曰一心定萬
物服惟陛下得之曩者北狄矜功耗蠹中國種類盤牙
根柢封殖異術肺附縞衣如荼朋邪作蠱浸淫宇內倒
懸不解百有餘年既而龍祠湮滅攜國款塞質帝女戲

漢疆有狼顧平城之心鯨吞盛樂之志爰命梟將搴旗
刈旃兵鏖穹廬火烈荆榛颺厲幙碎輶輶六羸遯逃貴
主生還剗滅妖迹剷除醜類故名王結髮冠帶入臣堅昆
稽首覲譯來獻而又奸臣放命二紀陸梁據太行之固
下窺洛邑通故絳之道旁睨近關樹其遺孽以竊兵柄
議者僉曰精甲十萬積穀十年泉魚不察湯網宜懸陸
下雄斷霆聲羣疑冰釋揚清風以掃雲鼓迅雷以破山
任馮異則拔天井而震上黨文吳漢則發突騎而傾邯

鄆壺闕失嶮山東奪魄屬有戍邊叛將竊發參墟人心
搖蕩異議放肆陛下臨朝而言曰二寇獲罪於天子所
不捨未三旬而定晉陽纔期年而滅潞子不以金購狝
將多降不勞師克粵首馳報非至德感物孰能臻此乎
由是台宰百辟藩屏將帥上言曰成伐東夷而肅慎來
賀景剪七國而王室乃安莫不始於武功終致刑措將
以裡上帝薦祖宗宜受鴻命以荅玄貺陛下猶謙而五
讓之勤請罔已乃屈已以俞之雲漢為章所以昭法度

也神明其德所以成教化也巍乎有功帝堯之則也勤於大道玄祖之訓也臣等不勝大願謹奉玉冊玉寶上尊號曰仁聖文武章天成功神德明道大孝皇帝伏惟陛下不有其名以保其成不德其功以成其盈享殷宗之福致周道之平熙我王度玉振金聲臣德裕等誠歡誠躍頓首頓首謹言

應乾聖壽太上皇冊文

張弘靖

維永貞二年歲次丙戌正月丙寅朔皇帝臣某稽首再

拜奉冊言臣聞上聖玄邈超乎希夷強名之極猶存乎
言象豈足以表無為之化光不宰之功然稱謂所施簡
冊攸著涵泳德澤感於精誠願奉鴻徽有以自竭伏惟
太上皇陛下道侔玄元業纂皇極膺千載之休歷承九
聖之耿光宣昭化元發揚大號政有敦本示儉慶有格
天漏泉恩翔春風仁育羣品而成功不處褰裳去之付
神器於冲人想汾陽之高蹈體堯之德與神同符其動
也天其靜也地巍巍事表無德而言焉顧茲寡昧屬膺

大寶懼忝傳歸之業莫申繼述之志夙夜兢畏惟懷永
圖今天下幸安皆睿訓所被而未極徽號孰報君親是
以台臣庶官文武之列抗疏於內方伯藩守億兆之衆
同詞於外請因壽厯以播鴻名臣不勝大願謹上尊號
曰應乾聖壽太上皇當三朝獻壽之辰應五紀啟元之
始光膺徽稱允叶神休斯天下之慶也臣稽首再拜

唐大詔令集卷八